

प्रमुख समाचार –

- 1— केंद्रीय स्वास्थ्य मंत्री मनसुख मंडाविया हे किहीन कि छत्तीसगढ़ के जनता ह राज्य सरकार के काम काज ले खुश नइ हे।
- 2— छत्तीसगढ़ लोक सेवा आयोग ह किहीन हे कि लिखित परीक्षा के अंक म विसंगति मिले म अभ्यर्थी अपन उत्तर पुस्तिका के फोटोकॉपी के संग आयोग म सिकायत प्रस्तुत कर सकथे।
- 3— मुख्यमंत्री भूपेश बघेल ह रईपुर के कौशल्या माता विहार के सेक्टर-बारह म 832 एलआईजी किसम के बहुमंजिला मकान के करीन वर्चुअल भूमिपूजन।

केंद्रीय मंत्री-पत्रकारवार्ता

केंद्रीय स्वास्थ्य मंत्री मनसुख मंडाविया ह किहीन कि छत्तीसगढ़ के जनता ह राज्य सरकार के काम काज ले खुश नइ हे, जेला सोशल मीडिया के माध्यम ले प्रकट घलो करत हे। दुरूग म होय पत्रकारवार्ता म ओमन राज्य के कांग्रेस सरकार उपर गरीब मनखे मन ल प्रधानमंत्री आवास योजना ले वंचित रखे के आरोप लगइन।

मुख्यमंत्री-लोकार्पण

मुख्यमंत्री भूपेश बघेल ह काली अपन निवास कार्यालय म राखे गे कारीकरम म कौशल्या माता विहार योजना के सेक्टर-बारह म 832 एलआईजी किसम के बहुमंजिला मकान निर्माण के वर्चुअल भूमिपूजन करीन। ए योजना म मकान लेहे के इच्छुक पत्रकार मन ल फ्लैट बिसाय म पन्द्रह प्रतिशत के छूट के संगेसंग आवास ऋण म अनुदान घलो दे जाही। ए योजना ह एक अप्रैल 2023 के बाद बिसाय गे मकान उपर ही लागू होही।

उहें, मुख्यमंत्री ह इही कारीकरम म रईपुर के देवेन्द्र नगर थाना के नवा भवन अउ माना क्षेत्र के धरमपुरा म पुलिस सहायता केंद्र भवन के वर्चुअल लोकार्पण घलो करीन।

वायु सेना दिवस

भारतीय वायु सेना ह आज अपन 91वां स्थापना दिवस मनावत हे। ए मउका म उत्तरप्रदेश के बमरौली वायुसेना केंद्र म आयोजित सुधर परेड के सलामी वायुसेना प्रमुख एयर चीफ मार्शल वी.आर. चौधरी ह लीन। ए कारीकरम म वायु सेना के नवा झंडा के अनावरण घलो करे गीस।

राष्ट्रपति द्रौपदी मुर्मू, उप राष्ट्रपति जगदीप धनखड़, प्रधानमंत्री नरेंद्र मोदी अउ मुख्यमंत्री भूपेश बघेल ह वायु सेना दिवस म वायुसेना कर्मी अउ उंखर परिवार ल बधाई दीन हे।

कारखाना-श्रमिक सुरक्षा

प्रदेश के श्रम मंत्री डॉक्टर शिवकुमार डहरिया ह किहीन हे कि कारखाना म श्रमिक मनके सुरक्षा ल पहिली प्राथमिकता दे जाना चाही। ओमन रईपुर म होय कार्यसाला ल संबोधित करत हुए किहीन कि कारखाना संचालन ले जुड़े लोगन मन ल श्रमिक सुरक्षा बर सबो उपाय करना चाही। कार्यसाला म देस के आने-आने क्षेत्र ले सुरक्षा क्षेत्र म काम करइया बिसेसज्ञ मन अपन-अपन व्याख्यान दीन। एमा कारखाना म होय दुर्घटना अउ ओखर ले बचाव के उपाय उपर घलो चर्चा होइस।

### राष्ट्रीय आयुष मिशन-कार्यक्रम

राष्ट्रीय आयुष मिशन के अंतर्गत प्रदेश म नौ ठिन नवा राष्ट्रीय कारीकरम सुरु करे गीस। एमा सुप्रजा आयुष मातृ और नवजात देखभाल, वयोमित्र, करुणा, आयुर्विद्या, एनीमिया संग लिम्फेटिक फाइलेरियासिस बर रूग्णता प्रबंधन अउ विकलांगता नियंत्रण जइसन नवा राष्ट्रीय कारीकरम सामिल हे।

रईपुर के पंडित जवाहरलाल नेहरू चिकित्सा महाविद्यालय के ऑडिटोरियम म होय कारीकरम म राज्य शासन के आयुष विभाग कोति ले डॉक्टर मन बर उन्मुखीकरण कार्यशाला घलो आयोजित करे गीस।

### राष्ट्रीय वन्यजीव सप्ताह

राजधानी रईपुर स्थित छत्तीसगढ़ रीजनल साईंस सेंटर म राष्ट्रीय वन्यजीव सप्ताह बड़ उछाह ले मनाय गीस। चिरई मनके जीवन उपर बिसेस ध्यान देके संगेसंग वन्य जीवन अउ प्रकृति संरक्षण बर जागरूकता ह ए कारीकरम के मुख्य उद्देश्य रिहीस। एमा भारतीय वन सेवा के अधिकारी शशि कुमार ह बर्ड वॉचिंग बिसय उपर गोठबात करीन अउ फोटो के माध्यम ले आने-आने चिरई ल चिन्हे के बारे म जानकारी दीन। ओमन एखर ले जुड़े पौराणिक कहानी घलो सुनाईन।

गिधवा परसदा पक्षी बिहार म "हमर चिरई हमर चिन्हारी पक्षी महोत्सव" के वीडियो पढ़ईया लइका मन ल दिखाय गीस।

### कुक्कुट पालन योजना

राज्य म कुकुरी पालन ल प्रोत्साहित करे बर छत्तीसगढ़ कुक्कुट पालन प्रोत्साहन योजना सुरु करे गेहे। एखर तहत कुकुरी पालन सुरु करईया उद्यमी मन ल अपन पैसा या बैंक ऋण ले पोल्ट्री फार्म लगाय म पांच बछर बर स्थायी पूंजी निवेश अनुदान दे जाही।

योजना म विकसित अउ विकासशील विकासखण्ड म कुकुरी पालन ईकाई के स्थापना बर 25 से 40 प्रतिशत तक पूंजी निवेश अनुदान दे जाही। बायलर, देसी अउ रंगीन कुकुरी के पोल्ट्री फार्म के स्थापना बर अ श्रेणी क्षेत्र म सामान्य श्रेणी के हितग्राही ल पच्चीस प्रतिशत, अनुसूचित जाति, अनुसूचित जनजाति अउ ईडब्ल्यूएस हितग्राही बर स्थायी पूंजी निवेश म तीस प्रतिशत के अनुदान दे जाही। एखरे जइसे ब श्रेणी क्षेत्र के सामान्य हितग्राही ल पैंतीस प्रतिशत अउ अनुसूचित जाति, अनुसूचित जनजाति अउ ईडब्ल्यूएस हितग्राही बर स्थायी पूंजी निवेश म चालीस प्रतिशत के अनुदान दे जाही।

### पीएससी-शिकायत

छत्तीसगढ़ लोक सेवा आयोग ह किहीन हे कि लिखित परीक्षा के अंक म विसंगति मिले म अभ्यर्थी अपन उत्तर पुस्तिका के फोटोकॉपी के संग आयोग म शिकायत प्रस्तुत कर सकथे। आयोग ह किहीन हे कि उंखर कोति ले करे जावत भर्ती प्रक्रिया म कुछू-कुछू सोशल मीडिया अउ प्रिंट मीडिया म उत्तर पुस्तिका के आधा अधूरा उत्तर के स्क्रीन शॉट वायरल करे जावत हे। जेमा ए बताय जावत हे कि प्रश्न के सही उत्तर नइ लिखे म भी नंबर दे गेहे। आयोग ह किहीन हे कि अगर कोनो अभ्यर्थी के संग अइसना होय हे, त ओह ए संबंध म आयोग के कार्यालय म स्वयं शिकायत कर सकथे।

### फुटबॉल लीग चैम्पियनशीप

छत्तीसगढ़ फुटबाल संघ के तत्वाधान म रईपुर, भिलई अउ दल्लीराजहरा म आज ले चौथइया राज्य महिला फुटबाल लीग के आयोजन करे जात हे। ए लीग बर चुने गे साठ नोनी खिलाड़ी मन ल खेल और युवा कल्याण विभाग के संचालक श्वेता श्रीवास्तव सिन्हा ह खेल कीट

प्रदान करीन। ए राज्य लीग चैम्पियनशीप म क्वालिफाई करइया टीम ह भारतीय महिला लीग चैम्पियनशीप म भाग लिही।

### अंशकालिक संवाददाता-आवेदन

आकाशवाणी समाचार, रईपुर कोति ले छत्तीसगढ़ के ए सात जिला- रईपुर, सक्ती, सारंगढ़-बिलाईगढ़, मोहला-मानपुर-अंबागढ़ चौकी, मनेन्द्रगढ़-चिरमिरी-भरतपुर, खैरागढ़-छुईखदान-गंडई अउ गौरेला-पेण्ड्रा-मरवाही ले अनुबंध म अंशकालिक संवाददाता मन बर आवेदन पत्र मंगाय जात हे। आवेदन प्रपत्र, सेवा प्रभाग के वेबसाइट- [www.newsonair.gov.in](http://www.newsonair.gov.in) के वेकेंसी सेक्शन अउ आकाशवाणी समाचार रईपुर के ट्वीटर हैंडल - [cg air news](https://twitter.com/cgairnews) ले घलो डाउनलोड करे जा सकथे। पूरा भरे आवेदन पत्र अवरईया बारह अक्टूबर तक पंजीकृत डाक या स्पीड पोस्ट ले रईपुर के सिविल लाइन स्थित, आकाशवाणी केंद्र उप-महानिदेशक (अभियंत्रण) सह केन्द्राध्यक्ष के नाम म भेजे जा सकथे।

आवेदक के उमर 24 ले 45 बछर के बीच होना चाही अउ पत्रकारिता या जनसंचार म स्नातकोत्तर डिग्री या डिप्लोमा के अलावा कोनो भी बिषय म स्नातक के संग पत्रकारिता क्षेत्र म दू बछर के अनुभव होना चाही। एखर अलावा आवेदक ह संबंधित जिला मुख्यालय या नगर-निगम सीमा के दस किलोमीटर क्षेत्र के रहइया होना चाही। संगेसंग कम्प्यूटर अउ इंटरनेट के कार्यसाधक ज्ञान होना चाही। केंद्र सरकार, राज्य सरकार या सार्वजनिक क्षेत्र के करमचारी अउ राजनीतिक दल के सदस्य, आवेदन करे बर पात्र नइ हे।

### संक्षिप्त समाचार

– वस्तु और सेवा कर परिषद ह ए बछर मार्च तक जारी मांग आदेस के संबंध म अपील दाखिल करे के तारिख 31 जनवरी 2024 तक बर बढ़ा देहे।

– आज कहानी सम्राट मुंशी प्रेमचंद के पुण्यतिथि हे। ए मउका मुख्यमंत्री भूपेश बघेल ह उंहला नमन करीन। मुंशी प्रेमचंद के साहित्य म योगदान ल सुरता करत हुए, मुख्यमंत्री ह किहीन कि प्रेमचंद ह एक संवेदनशील लेखक रिहीन जेनहा सरल, सहज अउ आम बोलचाल के भाषा के उपयोग करीन अउ अपन प्रगतिशील विचार के अमूल्य बिरासत छोड़ देहे।

– युवा मन ल जलवायु परिवर्तन बिसय उपर जागरूक करे बर पंडित रविशंकर विश्वविद्यालय म विज्ञान वार्ता के आयोजन करे गीस।

– लइका मन के पाचन सक्ति, स्मरण सक्ति, शारीरिक सक्तिवर्धन अउ बीमारी ले बचाव बर रईपुर के शासकीय आयुर्वेद महाविद्यालय चिकित्सालय म काली नवजात लइका ले सोलह बछर तक के 1,270 लइका मन ल स्वर्णप्राशन कराय गीस।

\*\*\*\*\*  
\*\*\*\*\*